

March. 2001
Volume 37, Number 03

Khristian Thukizakna



*Hiai thilte theisakpa, aman, Ahi: ka
hongpai pah ding, a chi. Amen:
Hongpaiin, Toupa Jesu.*

(Kilakna 22:20)

Editor: Rev L Kham Kho Lun

Contents

**Khristian
Thukizakna**

Vol 37
No 03
March.
2001

<ol style="list-style-type: none">1. Editorial2. Amen! Toupa Hongpai in3. Ruth Bell Graham4. Jentelte ni a beidek namte ni a naita5. Saptuam Kepna leh Nasepna Gahsuah Zaw6. Khros Sepaih Hangsante7. Reports8. Laikhak9. Thu Tuam Tuam10. Suuna11. Kipahthu Genna Leh Thumna Makai12. Naupang Tohlet	<p style="text-align: center;"><u>Editorial Board</u></p> <p style="text-align: center;"><u>Editor</u> Rev. L. Kham Kho Lun</p> <p style="text-align: center;"><u>Managing Editor</u> Rev. (Dr) Luaichinhang</p> <p style="text-align: center;"><u>Circulation</u> Mr. Ngulkhanjam Ngaihte</p> <p style="text-align: center;"><u>Production Managers</u> Rev. V. Pumkam Upa L. Vungzamuan</p> <p style="text-align: center;"><u>Contributing Editors</u> Rev. S. Langzakham Rev. M. Kamkhanthang Rev. N. Vungzasin Rev. V. Jamkhanthang Pastor M. Chinkhotuan</p>	
<p><u>Lakman :</u></p> <p>Kumkhat : Rs. 30.00 Bukhat : Rs. 3.00 Gamdang : \$ 5.00</p>	<p><u>Thusuah ding piakna :</u></p> <p>Editor : Khristian Thukizakna Dorcas Hall P.O. Box- 6, New Lamka 795128, Manipur, India.</p>	<p>Thusuah sunga kigente Evangelical Baptist Convention Saptuam ngaihdan ahi kim khol kei. Thusuahte in amau thusuah ah moh a pawtek ding uh.</p>
<p style="text-align: center;">Email: ebc@caltiger.com Phone & Fax: + 91 3874 - 33340 No of Copies : 4,300 EBC Website: http://dorcashall.tripod.com</p>		

Guest Editorial

Khristian Thukizakna tungtawnin simtu tengteng na vek un chibai kong buk masa hi.

Pathian in hon makaih a EBC saptuam sumkum (financial year) beina ding kha tan a honpi tak manin hiai tan honpi kaitu i Toupa min phat in A kiangah kipahtu i gen hi. Pathian in a nasemtute khasum ahunhun a kipethei dingin hon vualzawl a, nasepna lam tampi a masawinna tuamtuam i muhte ziakin leng kipahtu i gen hi. Maban hunthak a i pai touh zelna ding ah EBC nasep paidan tangpi leh tup leh ngim i neihte kizak-sak thakna in anuai ah tamlou i taklang ding.

EBC Saptuam sunga kigawmkhawm saptuamte hun paisa apan tup leh ngim nei a pai in, lawptawp a thiltungte bawh tawmtawm a thiltungte kia sem hilou ahi chih theih masak a deihhuai. Buaina i tuah sungun bel meikang phelhthe bat ton omkha ding hi. Nasepna lam tuamtuam a pai hoih nading leh lamzan zawk ding ngimna in Department 4 in kikhen hi. Tuata anuai abang ahi:

Khatna, General Administration Department (GAD): Phualpi, New Lamka, Dorcas Hall ah kinga a, tua pansan in District 6 ah tualsung Saptuam kivaipuakna vaisai in, Field Office mun 3 a neiin Mission field nasepna vaisai in enkai hi. GAD a pai hoih louh chiangin nasep hat theilou in mavang theilou hi a theih ahihmanin ngaih poimoh pen a neih ahi. Apumpi a kikhai khawmna khat zong ahi.

Nihna, Ministries Department (MnD): EBC sunga om Saptuamte kep pichinna, kepbitna leh khantouhna nasepte sem hi. Tangthupha genzakna a uangbawl a, Saptuam omsa kepna (Pastoral Ministries), khotang na hoih sep leh khantouhna a ngai poimoh gige hi. Saptuam mite mimal chiat khalam a piching leh na hoih chiteng sem dinga kimtaka kivana a kim theihna ding a thiltup ahi. Saptuam mahni a kitoudelh a ngai poimoh a, tuaban ah Saptuam dang leh pawl dang tawh sepkhawm a lunglut hi. Ahihhangin, ei hon suksiat tumte tawh kizat tuah bel hoih asa kei.

Thumna, Institutions Department (ID): Saptuam School, Pathian thu kisinsakna leh khawtang khantouhna dinga poimohna theiin hihtheih aneih bang zelin a sem hi. Pilna leh siamna kichi zong Pathian launa leh Pathian mitna tawh a kizuih chiangin manpha kisa hi. Saptuam paitou zel ding khaalna, salam leh khalam khantouhna ding ngimna in school tungtawnin na sem hi. Sum leh pai khempeuh a sai ban ah, Grace Bible College, Evangelical Book House leh Printing Press leh Elim Home tungtawn in zong nasem hi.

Lina, Missions Department (MsD):: Hih department tungtawnin “EBC in tup leh ngim a aneih khatna Missionary nasep ahi gige” chih tangtun sak a sawm ahi. A tunga kigen department thumte hohtaka a paitheih chiangin Missionary nasepna zong hong hat ding hi. Ahihhangin, Mission Agency khat banga missionary nasep kia sem bel hilou hi. EBC pen Saptuam hi a, Mission Agency hilou hi. Mission Agency a semten Saptuam puh a tup uh ahihbangin Saptuam leh a semte’n zong tua mah tum ahihmanin pangkhawm a kitheih siamtuah poimoh hi

Tulel in EBC in hiai bangin Missionary nasem hi:

- (1) Mission field nei a missionary a sawlte leh a gammite zangin sem hi. Tuabang nasepna pen Nepal, Karbi Anglong leh Manipur phaizang ah ahi.
- (2) Midang, Pawldang Mission Agency tungtawn a sepna zong om hi. Tuate tawh kisai in tuni chiang chiang in Overseas Missionary Fellowship (OMF), Indian Evangelical Mission (IEM), Friends Missionary Prayer Band (FMPB) leh Tangsa Baptist Churches Association (TBCA) tawh semkhawm hi. EBC Mission Field-te ah alem liai leh EBC puhkhiat a kepzui ban ah amah leh amah kitoudelh thei Saptuam puhkhiat a, amau pau chiata Biakna neihsaka, Pathian Saptuam diktak piankhiat sak ding tup ahi gige.

Atunga i gen deudoute pansan in mimal chiatin i tup leh ngim theiin i sep ding banga sem in, i pan theih ding zah a pangkha i hina hiam chih kivel thak lehng i deih mahmah hi. Saptuam leh mission field a semtute, amaute adinga niteng a thumna a Toupa ana buan gige miten i panlak dingdan i phawkthakna dingin Toupa’n i kulna bangin hong vualzawl chiat hen.

AMEN! TOUPA HONGPAI IN

Rev S Langzakham
Contributing Editor

EBC kumsim Khawmpi 52na leh tukum 2001 sung a i saptuam thupi “**Amen! Toupa hong paiin**” chih ahi. Hiai thu tawnin saptuam masate’n Jesu Khris hong paikik ding a ngaklah thu uh a gen khiatna a azat uh ahi.

EBC saptuam mite i Toupa leh Hondampa Jesu Khris hongpaikik ding ngaklah tak leh tua adia kimansa in om leng chih deihna leh ngimna a i heutate’n hiai thupi a hon neihpih uh hidin i gingta hi. Jesu Khris hongpai kik ding ngaklah huai ahihdan leh tua adia kimansa a i om theihna ding in tuhun apan tunung a thilhong tung ding a Laisiangthou in ana genkholhte, Jesu Khris hongpai kikna ding telin aban ban in saulou in en masa leng i chi hi. Tuata hiaite ahi uh.

I. **Saptuam**: Ei pau a **Saptuam** i chih Grik thumal ekklesia ahi “Samkhia” ahihkeileh “Sapkhiat Mite” chihna ahi. Leitung A nutsiatma in Peter kiang ah “Ka saptuam ka lam ding” chi in Jesu’n thu ana chiam hi (*Matt. 16:16-18*) Pentekos ni in hiai thuchiam a hong tangtung pan a, tuani apan tuni

dongin Jesu’n a saptuam lamtou zel hi. Tu saptuam hun ahi a, a hun tawp lam, a bei kuan mah mah ah i ding lel lel hi.

II. **Saptuam Laktouhna**: (*1Thes 4:13-17*) Hiai Rapchar chi a i theih taangpi uh ahi. Saptuam hun a bei toh kiton in saptuam hiai leitung apan laktouh in a om ding hi. Huihkhua ah Toupa Jesu Khris a hong pai ding a, gingtu sisate kaihthoh in a om masa ding ua, ahinglel laite khek lamdang in a om ding ua, akiton in Toupa Jesu Khris tuak ding in huihkhua ah laktouh in a om ding uh. Ging lou/hotdam louh mite kia leitung ah nutsiat in a om ding uh.

III. **Khris Thukhenna Tutphah**: (*2Kor. 5:10*) Laktouh a om gingtute a din hiai thukhenna vantung ah a om ding hi. Hiai hotdam leh damlouh thu a thukhenna hilou in kipahman piak ding leh piak louh ding thu a thukhenna ahi. Pathian thupiakte zuih leh zuihlouh toh kisai in gingtute leitung a adam

kipahman a sang ding ua, khenkhat ten bel kipahman a sang kei ding uh.

IV. **Gim Thuakna**: (*Matt. 24:21; 2Thess 2:1-8; Kil. 4:19*) Vantung a gingtute kipahman piak a om uh toh kiton in leitung ah kum 7 sung daih ding gimthuakna a kipan ding hi. Hiai hun a kum 31/2 masa sungin galmuanna a om ding a, kum 3 ½ nanung zaw pen sung in gimthuakna leh buaina thupitak a tung ding hi.

Pathian a mi thum: Pa, Tapa leh Kha Siangthou a om bang in Setan, Gamsa leh Zawlnei taklou a kigawm ding ua, a thum un a pangkhawm ding uh. Gamsa in leitung miteng adia kipumkhatna leh hausakna ding thuchiam in Israel mite toh kilemna a bawl ding a himahleh anung sawtlou in hiai kilemna amah mah in a bohse ding. Ama nungzuite chiamtehna khat a pe ding a, tualou in mikuamah in a zuak in a leithe kei ding uh. Zawlnei taklou in mite zekhem zou in leitung pumpi a miteng ki-ukna leh sabiak khat nuai ah a om sak vek ding. Hiai gimthuakna hun Armegeeddon kidoupina in a bei ding.

V. **Armageddon Kidoupina**: (*Kil. 16:16; 19:19*) Hiai kidoupina ah Gamsa leh a kaihzatam ten leitung pumpi lakzoh vek tum in Megiddo phaizang ah

a kisekkhawm ding ua, gal bawl in kidouna mulkim huaitak, chikmah a om nailou leh omngei nawnlou ding a tung ding hi.

VI. **Jesu Khis Hongpai Nihveina**: (*Matt. 24:29-31*) Armageddon Kidoupi khit chiangin Jesu Khis leitung ah a hong paikik ding a leitung mite tung ah thukhenna a hong nei ding.

VII. **Keel leh Belamte Thukhenna**: (*Matt. 25:31-44*) Hiai thukhenna ah ginglou miteng leitung apan lakkhiatin a om ding ua, gingtute kia lalgam hun ah a lut ding uh.

VIII. **Lalgam Hun**: (*Isa. 11:1-9; Dan 2:44; Kil 20:4-6*). Hiai kumsang lalgam hun kichi ahi. Setan han a om in kokhuktobei ah khat in a om ding. Gimthuakna hun sung a thah a om gingtute leh Khis thukhenna mai a ding khinta gingtute'n Jesu Khis toh leitung pumpi tung ah vai ahawm khawm ding uh. Jesu Khis in kumpite kumpipa leh toute Toupa hi in dan hoih bukim in leitung pumpi a mite tungah vai a hawm ding. Hiai hun sungin leitung leh gamsate tung a hamsia omte lakmang ahi ding a, gamkeute ah thilhing a hong poukhe ding a, gamsate lauhna leng a beita ding. Nek-le-taak kiching a piang ding a, mihing lungtang leh leitung pumpi Toupa

theihna in a zelsuak ding. Bangteng hitamahleh mihingte lungtang bel a kikhkek tuan sam kei ding hi.

IX. **Setan Khahkhiatna**: (*Kil. 20:7-9*) Kum sang hun a bei chiangin Setan khahkhiat ahi ding. Aman namte zekhem nawn in amah nungzui ginglounge (kum sang hun sung a gingtute tate/tute) siatna ah a pilut ding.

X. **Lal Tutphah Ngou Thupi Thukhenna**: (*Kil. 20:10-15*) Lei

hihsiat in a om ding (*2Pet.3:7-12*). a ginglounge teng teng tung ah thukhenna nanungpen a om ding. Hinna laibu a min kimulou miteng leh Setan meidil ah paihlut in a om ding uh.

XI. **Tangtawn**: (*Kil. 21:22*) Van thak leh lei thak in a luite a khengkhe ding a dahna, natna, sihna leh zan a om nawnta kei ding. Hiai gingtu teng teng phaktawp/tunna ding ahi.

RUTH BELL GRAHAM

Lian Naulak Jr
Bungmual

Pasian in mihing vaibelsia khat val thamte kianga a thugen dingin Billy Graham ana zangta hi. Kum 40 val America mite ngaihsan mahmahte lak ah ana telta a, khovel a mithupi, vaihawmtute leh mihausate tapi ana kimuhpih khinta hi. Laibu a gelhna a leh khot hoih ding theihsa amah thugenna pan tapi'n Jesu nungzui di'n ki-apkhia uhi. Tua mipa zi tanchin genuam i hi.

Hichibang hong pian theihna bang ziak hiam? Billy Graham theih mahmah khat in "Billy kimkhat Ruth ahi" achi hi. Bangchi dan in maw? Khatvei Billy Graham in Christian innkuan chih thupi a nei a thugenna

a neihzoh in, a zi kiang ah a thugen bangchi a sa hiam chih dong hi. Ruth in hoih mah hileleng thilkhat "Tua bang hihiam chi dotna a dawnna ah" "Na hun zatdan" cin a dawng hi. "Hunzat dan, bang chidan e?" "Minute 11 zi in pasal tung ahih dingte genna in na zang a, minute 7 kia pasal in zitung a hih dingte genna in na zang" chin Ruth in a dawng hi. Ruth Mc Cue Bell, Dr Nelson Bell America missionary china gam a om tanu thumte laka nihna ahi. 1920 in China gam ah a piang hi. Aneulai in Tibet a missionary a kuan a tum tinten hi. A thumna ah "Toupa aw, suamhatte hon mansak inla, Jesu min in ka ngawng beek hon tan uhen" a

chihchian a u Rose in “Amen” chinuam lou in “Toupa, a thumna dawng ken” chin ana thum hi.

A pasal hong minthan mahmah chian politiks a kigolh khak ding veng mahmah hi. Khatvei 1964 kumin President Johnson in anne di’n White House ah chial hi. tua ah Billy Graham minthang ahihchian Vice President dia guan a, election tuhpih di’n zawn hi. Politiks a pan kihpekhiak ding chih hilhthakna dan in Billy Graham suizauh hi. Kitheih khem mohbawl in Billy in bangziak a non suih” chin a zi dong hi. Ruth in Kham thil toh kisai kia a thuhilhna pedia lam-etna hilel chin a dawng hi. President zi in Ruth a tonpih khia a, “Tun a paikheta ua, na ngaihdan diktak hon hilh vele” chin President in dawpthak hi.

Happy Marriage pen “union of two forgivers” ahih ngai ahi ana chih ban

ah, mi nih a kithutuah gige uleh, khat a poimoh kei ahi “chih Ruth in a gen hi. Nupa kal a kiselna om theizel pen amah tuah a pan a gendan in” A khawklua a i ngaihkei leh kiseel leng nuampi khat ahi” a chi hi. A tanu Bunny in bel a nu-le-pa kisel lam uh thei ngeilou a hihdan ana gen ngeita hi. Kitenna lawhchin theihnang in kipumpiak tuahna (mutual submission) Pasal in thutan tawpna nei ahi chih pom ngai ahi a chi hi, theihkhohlhloh a tuahphut hilou in hahpanna leh sepgimna gah a kitenna pen lawhching touden hi’n Ruth in gen hi.

Passal nei ding numei khat kiang ah “Na pasal Jesu kia om theih bang a om di’n gingta ken. Bitna, kipahna, muanna leh itna Pasion kia in hon piak theih na pasal apan lamen kei in” chin Ruth in thuhilhna pia hi.

JENTEL TE NI ABEI DEK NAMTE NI ANAITA

L K Son Tombing
Tuima

Tangtel: Luka 21:20-24
Jentelte ni, kichi paukam lar tak bang mah leh a awm ziatak sui ngeilou i tan maithei huaiziakin tam lou in kikum khawm le chih ka ut hi.

JUDATE PUKSIAT JIAKIN JENIETENAWMHI

1. Pathian nam tel Juda ten Toupa Jesu a gam uh leh a nam uh dam nang deih lou a nawlkhin a Baraba a tel jawk ziaak un Toupa thu khun a puk san ziaak
-

un Jentelte ni a hong awm hi. Huchiin, Toupa Jesu sisan moh tuh amou leh a ta te uh tung ah bangchi tuk in a hong tunga chih ennawn le, Jesu deih lou a Baraba telte tuh AD 50, 60, 70 khawng in nam leh gam zalen nang zongin Rome Sorkar a hon dou uhi. Himahleh Rome Sepaih ten AD 70, in ah Jerusalem nasa takin a soisa ua Juda te tampi a that ua a thah bang teng uh salin api uhi. Nam leh gam ading suah di awm nawnlou din salin api ua AD 70 a Rome ten Juda te sal a api ua pat a gam utuh daih in a dai maimah hi. Juda ten mittui tak zoihzoih komin migam a sala awm din a gamuh a pai santa uhi. Luka 21:20-24 a i Toupa Jesu thu gen i muh mah bangin, Sepaihte'n Jerusalem a um ua namsau a a sihdi thu uhleh, Jentel te ni a beima teng Jerusalem Jentelte opkhum a awm di thu AD 70 ah a hong tung ta hi. Huchi in Rome ten Juda sala a matte uh toh gam tuamtuam, England, French, Germany, leh Spain gamte ah a thon zak ta uhi. Toupa Jesu sisan moh tuh a tate uh leh a suante uh tung ah tung ta hi. Huchiin Toupa'n Jentelte lak ah tanchinhoih a tun zota hi. Judate tuh mi gamah gam nei louin AD 70 apat 1948 tan a vakvai ta uhi. Huchia Rome Sepaih ten Jerusalem leh Juda gam a soisak lai un, Juda hithou

messia poma gingta a penticost ni a Khasiangthou tangte tuh, Sepaihte'n Jerusalem a soisak lai un amau tuh pelh in om ua, Rome Sepaih te khut thuak lou in a awm uhi. Huchin a mau Juda te lak a tangthu pha gen theilou ahihziakun Jentel te lakah a hon genta uhi.

JUDATE DINSUAHNA

2. Hunte kholloua pai zel ahihziakin, Judate tuh migam a gimthuakin salin a awm ua, huchih lai in, nikhat tuh, Dr Theodorhers kichi Juda mi Paris khopi ah a hong vak a, lai kitakte a muh chiangin Judate that un, Judate na muhna uah that un chih khong a hon muh chiangin a pona mahmah a, huchin apai a aki ngaihtuah a Pathian sap hi in a kithei ta hi. Huchin, Ezekiel laibute khong a hon zil a guam a guh awm khawm mihing a hongsuah a sepaih hattak a hongsuah thute khawng a hon jil chiangin Pathian sap ahih a hong kiging ta ta a, huchin ah World Zionist Organisation chin a hon din a, khovel a gingtu Zion mite kigawmkhawmin a hong hat panta uhi. Huchin Russia ten

Juda gam tuh Romete khut apat a la ua, huchin ah Dr Theodorhers leh a lawm ten a gamuh a va ngen ua, Russia te, tua UNO te hitaten a ngaihtuah ua, huchiin Judate a gamuh piak di ahi chiin AD 1948 in hon peta uhi. Judate tuh kipak tak in a gam lam ua kikin Juda gam chi nawnlou in Israel gam chi in a ki pota uhi. Huaiziakin in ei Zomi te le gam leh nam dam

nangin Toupa Jesu nol khin a Baraba i tel khak di a lauhuai pen hi. Huaiziakin a hun lai a ki ngaihtuah in messia mah tel le i gam leh nam a dam ding hi. Namsau leh teiin a hon hon dam kei ding hi. Kidouna zaw Toupa kidouna ahi ngal a.

Toupa'n a thu simtu teng teng tungah honvual zawl ta hen.
Amen.

SAPTUAM KEPNA LEH NASEPNA GAHSUAH ZAW

Pastor H Jamkhanpau

(Matt. 16:13-20; 1Kor. 2:1-5; Nas. 20:17-35) Saptuam kepna leh nasepna dan ka awlmoh khat ahi gige a, i vel chiangin chialpina leh programme tam zawte gahsuaah leh pichin theihlouna i kepna leh nasepna dan mulmal louhziak ahi. Adiakin, tu hun na nung a mite hinkhua leh tu hun a pilna a san bangin Khalam makaihna nuai a thutak a saptuam kep poimoh lua ahilmanin, pan lakthak poimoh lua kasa hi.

I. Saptuam kingakna leh lamtouna thutak theihchet ding ahi:

1. Jesu Khrist Saptuam kingakna leh kilamtouna bulpi ahi

Pathian thilhih theihna bulpi ahi. Kepna leh nasepna ah leng Kha thilhih theihna a sep a, Pathian thilhihtheihna a kinga a hihding ahi. Huaiziakin, mihing pilna leh thahatna, sum leh pai, neih leh lam a saptuam lamtoun det theilou hi. Pathian thilhih theihna Tanchin hoih mah a kepa, i sep ding ahi. Huaiziakin, Jesun kei kua kahi nawn chi ua? chih aman theih chetna ngai poimoh pen hi.

2. Vihawmna dohkan ah hilouin, thunasep a saptuam uk ding ahi. Paul in Korinth saptuam buaitak hihdamna dingin

Pathian thilhih theihna Khros mah pansan a sem kinken hi. Tua mah buaina tengteng damna bukim omna ahi. Nas. 16:1-7 ah sawltakten vaihawmna, genthei panpihna dohkan kia abuaipih chiangun phunna leh kitheih siam louhna piangsak a, thum leh thu nasep dia hong kipiak chiangun mipi, saptuam damin hotdamna sangmi kibehlap uhi. Tua ahihmanin committee, department chih buaipih pen ding leh saptuam kepna leh nasepna ah tanchin hoih a saptuam kilamtouh na ding ahia, Khrist a bukim a pesawn thei dingin Khros mitvak zang a mite taksap pen a kep ding ahi. Eite hilouin Pathian thilhih theihna Gospel in saptuam lamtou in khangsak ding ahi.

3. Tangthu pha puanzakna tawn a saptuam nasep leh kep ding ahi: Paul in niteng a temple, synagog leh in tung ah Gospel ginna leh kisikna thu gen uangbawl in nna pipen anei in mi zouzel hi. Tua bangin saptuam ah hotdamna sangloute, nungtolh, khialte leh puksiate kep a, inn teng a Gospel gen uangbawl a, tua committee chih in nna pipen a i neih chiaah saptuam khangtou ding hi. Huaiziakin i programte budget, project leh vaihawmna kian saptuam khangtheilou in buaizak a, hiaite Gospel a kibilphuh dia, thunasepna a

saptuam uk in tangthupha mimal chih puangzaktu hia, koimun peuh ah Gospel houlimna a zangthei Saptuam i hih ding ahi. Jesu itna a Khate awlmohna mittui neiloute keu in tuipi si bang ahi uhi.

4. Biakna leh pahtawina a kepna leh nasepna dik: Gingtu saptuam om nasan Pathian biak leh pahtawi ahi (*Eph. 1:6*), saptuam hinkhua pumpi Khrist hauhsakna eimah a omsak a, phatna leh kipahthu gen gige a luangkhe dingin Toupa'n hon deih hi (*Kol. 3:16,17*). Hiai mah khanna, hatna thuguk, Pathian kipahna leh lungkimna pen ahi. Hiai pen Kha a dimna gaha kha leh thutak a biak ding ahi (*Jn. 4:24; 7:38,39; Eph. 5:18-20*).
5. Missionary nasepna: Mahni tualsung a tangthupha puanzakna leh pawlam a missionary nasepna kibukkim taka paikhawm ding ahi. (*Nas. 1:8*). Khat hatzaw, khat limsak loua ompen bukim theilou hi. Saptuam kepna leh nasepna in missionary nasepna akepsuah ding ahi, tua ahihma teng a omna san, kepna nasep sem khalou hilai hi. Missionary nasep limsak loute damlou nuam hi (*Nas 8*), a damna dia ann hoihpen missionary nasep ahi zel hi.

II. Saptuam Kepna Leh Nasepna A Theihtuakte:

1. Makaite'n Khros mit a hak a mite dinmun thei a, inn vehna,

- gingtu mimalte, innkuan, khosakna en a, taksap tung bukimna Khrist thu gen ding ahi. Vaihawmna ah leng agenda thupipen ahih ding ahi.
2. Kha makaihna toh vision diktak neih: Kha makaihna leh thuzohna nuai ahin poimohna thei a, tua lunggulhna leh zonna thutak a kinga in, halhna poimohna phawk a, Pathian deihlam theitel a, mite dinmun, maban ding muhna dik nei a, Kha thilhihtheihna taktak mah toh saptuam kep ding ahi.
 3. Thu nasepna leh Biakna: Local Pastor omlouhna ah leng thilpiak neih mah, thumna leh Bible thutak sin a, Kha makaihna toh kisakhoh in, khateng thupi, i taksap bang a guan a omze neitak leh paidan/ tup kichiantak nei a pai ding ahi. Hiai dingin Tuailai Lapawl hohtak biakna a zat theih ding bawl a, Biakna pitu ding kiban khelhouin ahitheite mah bawlin, thupuangtu ding kibawl in, biakna a thilhihte pangkhawm dingin kimukhawm in, plan bawl in, thumna toh kisakhoh in mohpawtu ding kibawl in, michih lunglut theih dingin bawlleng. Tua ahih masiah i biakna kikhop, lungput leh ngaihdan dik theilou ding ahi.
 4. Pastorte leh skulpu, semtute hihna ding: Siamna lam a chinna kia hilou in Kha adim, sapna diktak, kipiakna diktak leh Kha thilpiak nei, mi piching i hihding ahi. Tua ahih keileh saptuam kepna leh nasepna dik theilou dia, dan bang lel apaitou ding ahihmanin Gospel thutak a kinga, Khros mit a hak a itna taktak toh kipumpiak a, saptuam lamtounhna veina neimi i hihkul petmah ta hi.
 5. Missionary nasepna: Kithu-zakna leh mohpuakna a tamtheipen a gen leh kisinsak a, nna pipen a nei thei i hihding ahi.
 6. Kisinsakna: Makai leh gingtute Bible leh nasepna, makaihna leh nna tuam tuamte kisinsakna uangbawl ding ahi. Tuain i dinmun, mohpuakna leh nasep dan siamna leh pichinna honpe ding hi. Tua ahihma teng, pulpit a lungsim a ompeuh, mahni ngaihdan a genkhiat lel leh mahni theihna lel a kinga a, ei lung lutna dan lel a kikep in gahsuh lou ding hi.
- Huaiziakin Khrist thutak a kibulphuh in, Khrist lungsim kikoppihin, tua thu houlimna a zang thei khopin koimun peuh tangthupha genna mun suak sakin, itna mittui toh puk leh bah, meikuang laka omte hotkhiatna nasep thupipen a neiin Kha thilhihtheihna toh Jesu a atangtawn thiltup bang bangin sem leng gahsuh pen ding hi. Jesu hongpai chiah-saptuamte Kha, pumpi, lungsim gensiat bei a nungak siangthou banga saptuamte ipiak/kipiak ding a tup leh deih ahi.
-

Kros Sepaih Hangsante

Rev V Jamkhanthang

Contributing Editor

John Paton (1824-1907)

(Mi sanete laka nasem)

Hinkhua masa: John Paton tuh Scotland gama piang, a nulepa Pathian limsak mahmah mi ahi uh. Apa sumdawng mi ahi. A inn uah mun khat “Mun siangthou” tua mun ah nikhat in thum vei a inkuanpihte a ding, Scotland gama ding leh Khawvel pumpi a ding in thum gige hi. Pathian a limsak banah thum mi mahmah ahi. Tuabanga Pathian mitna leh thumna hinkhua ten John Paton hinkhua nasatak in achou a, apa banga Pathian toh kithuah a vak khawm gige ding in a kichiam hial hi. Anu zong Pathian it leh limsak ginna hattak nei nu khat ahi. Nikhat tuh a pasal khualzin kalin a insung ah nekding bangmah om lou in, a buai mahmah hi. Atate gilkiat anduh a omte samkhawm in, nekding bangmah neilou ahildan uh gen in Pathian kiang ah atunta uhi. Zingchiang a annak ding tapi Pathian in peding ahilhthu atate hilh in lupna ah ihmu sak hi. Zingkal in a taksap lamuh thei hi lou piin, a pasal in nek ding bawm lianpi, ahon khak hong tung mawk hi. Ataten lamdang sa mahmah ua a kiang uah, “Aw ka tate! napa uh vana om it

un, na poimoh uh leh taksapte uh ginna toh ngen un, Aman na kul uleh poimoh bangbang honpe ding hi” chi hi.

Kum 12 aphak in a pa nasep panpih kawm in Latin pau leh Greek pau sin hi. Tua banah tunnung chianga missionary a akuan chiang a, a kul leh poimoh vanzat a zat ding, thil tuamtuam kaikhawm in, khawllam toh kisai leng a zil hi. John Paton in Jesu Khrist a Hondampa ding in sang khinta a, Amah nasepna akihel ding lunggulh panta hi. Glasgow ah Bible sin hon pan a, amah leh amah kichawm kawm in damdawi lam leng sin khawm hi. Akivakna ding in School khat ah naupangte lai hilh lai hi. Huchiin, Glasgow City Mission kichi a hon zoma, khawpi sunga namniam leh tuantual te laka nasepna honpan hi. Hunsawt pi asepnungun zong lungkiak huaitak bangin kilang mahleh, John Paton in lungke lou hialin ginom takin sem zel a, kum 10 sung ginom taka sep nungin zu ngawlvei honpi hong piangthak uhi. Toupa grep huan lianzaw sema sep theihna ding in

A ban pek 14 ah en in.



EBC
Biakinn
Daido
Thanlon
District

EBC
Biakinn
Bethani,
Bungmual
Lamka
District



EBC
Biakinn
Suangdai
Singngat
District



D Leikot, EBC Biakinn mun ding Suangphumna Director (MN) a nei hi.



Songtal
JB
School
inn
behlapna
Director
(I) hon
khiakna
leh
Pathian
kianga
Latna a
nei hi.

Page 11 *sutzopn hiah:*

aneu zaw mun ah nasep honpan ahi hi. Hiaibangte a sep kawm in University a asinna te tawpsan tuanlou hi.

Missionary Dia Sapna: Hun sawtpi a kipan John Paton in gamdang a Jesu Khrist neilou a mangthangte kianga Tangthupha puaklut ding puakgik in anei hi. Gamdang a missionary dia sapna tang hiin a kithei ta hi. Tua hunlai in John paton in “New Hebrides” namte laka missionary omsate huh leh panpih kul ahi uh chih athei hi. Kuamah midang a kuankhia a omkei a, atawp in Pathian sapna hiai bangin honza ta hi. “Kuamah midang ahoih zaw kuan ding dang a omkei leh, nang thou inla, nang mahmah kuan in” chih a za hi. John Paton zong Toupa sapna ah kipe paha, sang pah hi. Himahleh

Glasgow City Mission in aphal kei uhi. Alawmte leh a seppih dangten lah, hiai nasepna lohching taka apai lai a, mun dang a vakuan khiak ding pen theisiam theilou uhi.

Nikhat tuh putek khat in John Paton kiang ah, “Kuan dah in, Tangval aw! nang a dia lauhuai ahi. Mihing sane ten honne ding uh ahi” achi hi. John Paton in zong nuihsan kawm in, dawng hi. “Pu aw, nang na kum zong tamta hi, hankhuk sunga thante leh lungte nekding in na lum hak nawn kei ding hi. Kei Jesu Khrist nasem a ka sih hial leh zong mi sanete nek gaih aki lamdanna om tuanlou ding ahi” chi hi. John Paton nulepa ten zong Toupa pi leh makaih dingin a hinkhua pekhia uhi. Mihing sanete laka nasem dingin John leh a zi neihchil tuh 1858 kumin hong kuankhe ta uhi. Tua hunin John Paton kum 34 mi ahi. (*Aban sutzop ding*)

REPORTS

ABF Gen. Secretary apan:

Hiai Asian Baptist Digest apan a teisawn Rev P Bonny Resu General Secretary ABF Report laktom, a kualzinna thu ahi

July 1-9,2000 - sung BWA General Council, Hanava Cuba ah kava kichel hi. Gam tuamtuam apan

paikhawm palai 500 val in vaihawmna hun kizang khawm hi. Hanava a Baptist Saptuam om masapen in hiai Council na zintun hi. Hiai tuikulh gam mihing 12 million khawngte omna, Baptist Saptuam 1 Lakh vel omna mun ahi. Hiai gam ah Pathian kha nasepna pai hoih zel hi, Cuba gama dingin thum chiat ni.

September 8-10, 2000 - sung Manipur, Uppar Lamka ah EBC Lamka District Tuailai khawmpi ah thugena tu in ka pang hi. Mi 3000 val kikhopna nuam leh thupi mahmah a, ni nih sung in 5vei thugenna hun ka zang hi. Toupa a dia thupukna thak nei a kilan thak thei bangzah hiam om hi. Hiai khawmpi sung tengin huai khawpi sung a om mihing 1 Lakh velte ettheih dingin Live Telecast ahi. Hiai Saptuam BWA leh ABF a member thakpen te laka himahleh, anasep nate un hon hip mahmah hi. Missionary lunglut in India leh gam dangte ah leng sawlkhia uhi.

September 27 - October 3, 2000

- sung Singapore Baptist Convention kumsim khawmpi ah thugenna hun kazang hi. ABF a Gen. Secretary kahih nung a Singapore Baptist Convention ka vehna masapen ahihman in ka kilopa nuam ka sa. Khawmpi zang kia hilou in, SBC leh ABF pangkhawm a mission nasepna hatsemna ding ngimna a kithuah khawmna hun poimoh tak bangle ka nei uhi. Tualsung saptuam nih ah Nipini in thugenna hun kazang hi. Tuateng banah Singapore Baptist Theological Seminary a studentte lakah thugenna hun ka zang hi. Tuin SBC ten Asian Baptist Leaders Conference zintun dingin kibuatsaih lel uhi. Vualzawlna tampi toh inn lam ka kik hi, SBC makaite thumsak ni.

October 4-8, 2000 sung BWA leh ABF kithuah a vai saikhawm in Baptist in Worship Conference masapen Hyderabad ah neih ahi. Hiai ah Sri Lanka, Bangladesh, Nepal leh India state tuamtuam akipan palai 1000 vel paikhawm hi, Biakna dan chi tuamtuam leh i tawndante pansan a Pathian Biakna tuamtuamte sinkhawmna bang leh Biak khawmna hun zat ahi a nuam leh thupi mahmah hi. Hiai hun ah Naga Folk dance, Mizo Lapawl akipan Halleluiah Chorus leh special no dang dang ten khawmpi sunuam mahmah hi. Hiai khawmpi apan in “Thil dang teng sangin Biakna mahmah in Baptist mite hon gawmkhawm hi” chih ahi.

October 13-15, 2000 – sung in Arunachal Pradesh a Naharlugun mun ah Nishi mite kiang ah Nishi Baptist Leadership Conference ah ka kihel hi. Hiai Conference ah palai 300 Pastor, Tuailai leh Numei makaite hong tel uhi. Calcutta apan BWA Vice Preseident Mr Zac Patnaik toh kahi ua, local Saptuam khenkhat vehna leh Bible Schoo nih phakna hun lemtang ka nei kha uhi. Nishi namte India Malsuah a singtangmite laka tampen ahi uh. Hun paisate ah Khristiante gelgawt namte na hikha ngei mahleh uh, Tangthupha paizel in mailam nawt zel hi. Nishi mite 30% Khristian ahi ua, Baptist ngenphial hiin Biakin 200 khawng om

hi. Nishi Khristiante leh makaite thumsak ni.

October 16-17, 2000 sung Assam Pastors Conference Guwahati mun ah hun ka zang hi. Saptuam pawl tuamtuam akipan palai 500 hongpaikhawm uhi. Church Leadership Development Internationalte vaisaina nuai a Conference kinei ahi.

DORCAS DAY REPORT TOMKIM

Bangchik maha i pipu khanga i neih ngei nai louh uh leh i zat ngeinai het louh uh **“Dorcias Day”** January 21, 2001 in Convention Saptuam sungah Dorcas Day masa pen zat ahi hi. Hiai program zang khempeuh in nuamsa mahmah chiat in Pathian vualjawlna thupi tak ki dawng mahmah hi. Khua tampite’n amau khua a Dorka Pawl a phut khia tute puan silhsakna, pakkhi ohsakna, tagah genthei leh meithaite kiang a thilpiak manpha taktak piakkhiakna hunin nei uhi.

Hiai hun in Karbi Anglong Field a Dorka pawl in Area Dorka khawmpi toh kithuah in Dorcas Day leh Golden Jubilee lopna nei khawm uhi. Karbi Area Dorka Pawl in Meithai taktak Bible in a chih bangin kum 60 tunglam pasal khatvei neite mi 9 kiang ah Blanket

(buthupuan) 1 chiat pia uhi. Pitek khat ngial in hichi tuka thil piak thupi ka damsunga ka khatvei dawnna ahi chi hial hi. Pathian phat in om hen.

Khua khenkhatte’n gan gou hial in nakpi takin hiai ni na zang uhi. I ni poimoh mah mah uh ngai poimoh taka i na zat siausiau jiaakun khochih saptuamte tung ah lungdam thu gen hang. Dorcas Day zatna tungtawn in Pathian in thupina tang hen.

Hiai ni zatna report kimu N.E. Tangnuam EBC te a hiai a nuai ah a tangpi i taklang ding:

NE Tangnuam EBC in Dorca’s Day January 19-21 2001 daihdng Program kibawl in, ni nih sung Ankuang luyin kidemna Item tuam tuam te thupi takin zang uhi. Thugenpi ding in Pastor M Ginzatun zat hi. Thupi: Numei leh nahoih sep, Nasepte 9:36 pansan in thutak ankuang luina nei hi.

Thugen tuin Numei leh na hoihsep chih thupi a zang in, Khristian na honglut tung laia numeite dinmun leh tulai numeite dinmun a kikkiak dan gen hi.

Hiai day tawh kisai in saptuam sung ah thilpiak tuam tuam hawmna anei ua, hiai a nuai a bang ahi:

Upa Ordain mi 7 leh Pastor kiangah kamis khat chiat pia uhi. Gentheite panpilhna a hawmkhiak: Puanza - 4, Puanak lum - 8, Sum tangin Rs.

350. Hiai banah kidemna item tuam tuam a telte present pe vek uhi. **Day Lopna a gan goh uh:** Bawng - 1, Vok - 1, Ak - 8. Day zatna a, sum sen teng teng uh Rs 1,2,361 ahi. Sumlepai, salam leh kha lam ah vualjawlna thupi takmai tangin, khamlou leh khelah takin Day lop a zou uhi. Dorcas Day tungtawn in Pathian in thupina tangta hen.

— Dorcas Worker


Lungthul E Tuailai Bible Camp

EBC Lungthul E ah Tuailaite saina in KTP Bible Camp February 8-12 2001 sung JB School ah neih ahia, hiai hun ah Rev L Kham Kho Lun Executive Secretary leh Pastor S Ginjam ten thutak genna hong nei uhi. Bialtu Pastor leh ahong juitu dangte toh a vek un mi nga pha uhi. Pathian kha in lamdang takin hong vaha, lohching mahmah hi. Camper 101 pha a, tua banah nupi leh papi hong galsim thoh leng bangzah hiam

omlai hi. Piangthak numei 43 leh pasal 34 agawm in 77 om hi. Piangthak sa kilat thakna nei 6 pha hi, Toupa phatin om hen! Camp tawp nitak in Biakin huangsung ah Camp Fire thupi taka neih ahia, mi bangzah hiam in a omdan hoih loute uh tawpsan ding chiamtehna in laia gelhin haltum uhi.

Hiai bang a Camp Lungthul khua a kineihna sawt law mahmah ta ahihman in poimohsa in tuailai ten kiksak kholna hun sawtpi ana neih uh, thumna, tha leh zung tampi taka senna uh ahi. Pathian in in kiskak kholna ching lou taka kibawlte hon vualzawl sakin, leh mangthang mai dinging hong it lailai ahihman in kipahtu gen in thupina tengteng amah i pia hi. Hiai Camp toh kisai a hon panpih kha thumna tha leh zung leh a dangdang a pang tengteng tungah leng ka kipak petmah uhi. Saptuam ten thumna ahon delh zui zel lai dingin kong ngen uhi.

- Lemlal & Khanpiang

<p>• Join the Celebration at the Lamka Christopher Sun Evangelistic Crusade 2001, Theme: "Jesus is the Answer" March 7 - 11 Ebenezer Academy Campus New Lamka</p>	 <p>Rev Dr Christopher Sun</p>
--	---

LAIKHAK

Thumsakna Ngetna

EBC Butabari a Toupa Saptuamte kepna a Local Chairman Bom Bahadur Rai zi Adimaya Rai in November 23rd 2000 nitak dak 5:20 in a it a inkuante nusia in thupina gam lam hon zot santa hi. Amah 1927 in pianga, 1980 in Jesu Khrist hondampa in sang hi, Baptisma leng tang ngal hi. A tapate laka inkuan khat leh a tanute laka inkuan khat Khristian suakta uhi. A tapate laka inkuan khat leh a tanute laka inkuan khat mah Khristian suak nailou omlai hi. Hiaite phawkin hon Thum sak un!

Toupa Saptuamte kepna a Secretary Mr Ram Chandra Sharma tapa Prakash Sharma kum 20 lel, 1997 a Jesu Khrist hondampa dia sang thei, Baptisma tang manlou in December 28, 2000 in thupina gam a Toupa kiang ah honpai san hi. Anu leh pa a inkuante thawmhau law mahmah uhi, thumsak ni, Hon thumsak un!

Sepaihte tunga kipahtu genna:

Toupa Saptuam mi nekzonna toh kisai a sepaih pang kou kiang nai a omkhate nasep thupi sain kon taklang ut hi. Sawmakhat bang Toupa a ahihlam phawk in Saptuamte lakah hongpe zel uhi.

Amaute: Mr V Thang, Mr Gouzachin, Mr Thangzasuan, Mr Satkholian, Mr P K Chin, Mrs Thianching ahi uh. Khristmas 2000 bangle Bhutta Bari ah unaute T.K Gen, P K Chin leh V Thang ten a inkuan chiat utoh hong zang uha, Phailian akipan Pu Loiri-te leng hong telin hon sunuam mahmah uhi. Hiai banga na kienkol maimai Saptuam in na thumsakna uh poimoh gige kahi uh chih genna in kon suah hi. Hon thumsak zel un!

- Samuel Lama

Nepal Mission Field

Saptuamte kiang

Laikhak:

Amasa in Van mun nopna thupi tak nusia a leimun niampen tanpha a amangthang ding khate hong zong i Toupa Jesu Khrist minin Chibai kong buk hi!

Nasepna: Ka nasepna IEM nuai ahi. Tulel in Maharashtra State a Amravati District (Melghat) ah Korku mite lakah kasem hi. Tulel a Khristiante doudal na uang mahmah na munte laka khat ahi. Saptuamten tawp chih omlou a non na thumpih gige ziaakun Toupa gam keklet in a om

zel hi. Amaute khawsakna ah lou nasem mi ahi ua, kiloh tawm a nek zongin nam niam mahmah lai uhi. Inn sau pipi bawlin, inkuan tampi a tenkhawm ban uah, a gan neihte utoh leng giak khawm nalai uhi. Agam uh Forest Department-te etkolna nuai ah oma, gamsa thah ding phal ahih louh manin Vompi, Sahang leh adangdang lauhuai tampi tak toh omkhawm uhi. Gamsa in mihing that thei a, mihingten gamsa thah ding phal louh ahi. Singtang gamte kaw! sang pipi omna mun a hi a, gam mang lakah gamsa lauhuai tam petmah hi. Nikhat ka khualzinna ah Vompi toh ka kituak kha guih uh a, himahleh noute hon thumsak na hangin bangmah hon loh louin ka kikhen nawn thei uhi. Khua sung ah gulpi khawng alut chiangin apai khiak matan etthoh mai ahi.

Sahkhua: Amaute pianpih biakna tuh ganhing bemi ahi uh. Hindu sahkhua in zouvek phialta hi. Kei sepna mun ah Khristian gingtu 200 val zek ka omta uhi. A gam mite Tanchin hoih za ut in kihong mahmah uh a, himahleh nam sang zawten nakpi takin thunun zou uhi. Hindu ten leng missionary neiin nakpi takin sem uhi.

Thiltuah khenkhat: Bhajan Program kachi ua, Khristmas madeuh in khaw bangzah hiam phain ka khual zin uhi. Kou theih louh kalin ka nung nung ua hong paiin Khristian

doudal pawl Shiv Sena kichi ten hong nung zuih nilouh uhi. Koute hon manin Gospel thu gen nawn lou dingin hong vau uhi. Hiai nam niamte Hindu sahkhua akipan Khristian suahsak vek na thiltup uh ahi maw! Koi a hong kipan, Kua hon sawl na hi uhiam? Kou society hihse dinga hong pai na hi uh? Kuan phalna honpia ahia? Film Projector pua na hi uh chi'n ka van tenguh a check ua, ka identity card-te uh hon laksak uhi. Ka Headquarter address uh gelkhkia in, maitang ah torch light a honsal ekin, iplah petmah in hon sal ekek uhi. Kou bel ka muh uleh ka theih uh, Tanchin hoih thu genlou theilou ka hi uh, ka mohpuak na uh ahi. Non vuak nop uleh hon vua un, ka kiman uhi ka chi mai zel uhi. Amau pathian min phat a kikou ding in hon sawl uha, Ken a pathian min uh genlou in "Jesu min phatin om hen" ka chihleh heh mahmah in hon ngeibet uhi.

Khristian doudaltu, amauten nakpi taka panla ahihman un tua munte ah nasepna kikhawl sak phot a, himahleh thumna tamsem toh pangkhawm lehang Toupan kong za zaw semin hon honsak ding hi. Khrist a nulepate aw hon thumsak zel un!

Mr Zamzakap IEM

THU TUAM TUAM

Biakin Honna nei uh

Thanlon District sung a om Mualpheng khua kum nih paisa in luahteih nawn louh ding thu a om ziak in March 3, 1999 niin Rev M Gousuan DS in Biakin khakna hon neihsak hi. Tuin heututen lemgeelna thak hon bawlsak in akhua mah leng luahteih nawn ding in omta a khaw mipite ka kipak law mahmah uhi. January 8th 2001 niin Rev M Gousuan DS mahin EBC Biakin luaht thak nawn ahihna dingin honkhiakna, siansuahna leh Pathian kianga latna hon neihsak ta hi. Toupa min phat in om hen! Saptuam kipan tungphet mah kibang nawn ding hihman in kuapeuh nuleh pa ten thumna a non phawk ding uh deihna in ngetna kon bawk uhi.

- *Upa Jamkhochin
EBC Mualpheng*

Biakin Honna leh Lopna

Thanlon District sunga om leh Mizoram malsuah lam a om Daido khua in Biakin abawl thak uh buaina bangmah omlou in zou siangta uhi. Hiai Biakin thak honna leh Pathian kianga latna Rev L Kham Kho Lun Executive Secretary in January 18, 2001 in nei hi. Thanlon District sung mah a om Bungpilon khua in EBC Biakin a bawl thak uh kumlui in latna

nei khin mahleh uh alopna leh Pathian kiang a kipahtu genna January 20, 2001 in nei uha, Rev L Kham Kho Lun Executive Secretary in thutak gen a, nuamtak leh kipaktak chiat in hun zang zou uhi.

Biakin Bawl Masapen Uh

Lamka District sung Mata akipan gamla lou mallam pangah D Leikot kichi khua khat kikat thak hi. Amaute Sadar Hills Leikot khua a kipan hong pai ahi ua, EBC Saptuam hong bel ahi uhi. Amau khawthak sat pan dia a kisakna uah, Biakin tun ding masak penpen ding, tua khit chianga tenna in dingte bawl pat ding chi uhi. January 23, 2001 niin Rev Dr Luaichinthang Director of Ministries in Biakin mun ding suangphumna leh Pathian kiang alatna nei hi. Hiai hun ah Rev Pankhanmang Guite DS, Mr H Vungkhai, Pastor N Vumsong leh Mata khua a Toupa Saptuam ten uap uhi. Tuin Biakin bawlna kisan mahmah uh a, Mata ten intekna lakpih in nasepna pai lel hi.

**Lamka Christopher Sun
Crusade 2001**

City-wide Crusade amin “Lamka Christopher Sun Crusade 2001” kichi khentuam neilou (Inter-dinominational) tukha March 7-11 sung Ebenezer Academy huangsung New Lamka ah kipan ding hi. Thugentu dingin Rev Dr Christopher Sun ahia, amah California USA ahong kipan ding ahi, amah nasepna min Christopher Sun Evangelistic Association (CSEA) team in a sponsore uh ahi. Hiai hun ah mipi 10,000 val kikhawm gige ding a lamet ahi, amaute makaih ding leh enkaitu ding in Stewards papi fel leh nupi fel ngen 100 kitel khia hi. Jesu Khrist hongpai kikhawn ma a Citywide Crusade nanung pen ahi keiding kuan achi thei a. Toupan ahong veh lailai tel, hichi tel a Hotdamna thupi ngeingaih kei leng bang chin ahia i suahtak mahmah ding, Unau! Dr Sun in Crusade zoh phet chiangin California zuanin kikhawn pah ding hi. Mi khenkhatte adingin hiai thu nasimkhak chiangin Crusade beita hi mai thei himahleh Pathian itna leh ahoihna thu nazak ten hon kipsaksak dingin ka lamem uhi.

- *Publicity Director*

Gujarat Zinling Veh Uh

India khawpita laka khat Gujarat ah January 26 akipan in niteng phialin zinling kizom tou ngitngat a

inn leh lou tampi a suksiat banah mihing hinna Lakh val bang mangthang zou ding a gintak ahi. Sihna tuak zenloute lungjing, lungkham, kap leh mau a omte panpihtu dingin khawvel kilteng akipan agency tuamtuam in huhna pia in tung zungzung hi. EBC Saptuam akipan inleng Pastor T Tunson leh a teamte zinling thuakte veh ding kuan uhi. Kiphamat zenin panpihna tung zungzung mahleh kidaih zouta chih om ngei ding hilou hi. Tua banah sum leh pai neih leh lam ten mihingte lungkhamna leh thawmhauna nem zou taktak ngeilou hi. Huaiziakin Gujarat in a taksap pipen Jesu Khrist ahi chiha phawkna ding un thumsak chiat ni.

Principal Thak

Ebenezer Academy a Principal thak ding zonna khalui sungin om a, interview board in hoihpem ding leh fel leh kizen ding a lametna lianpi neia atel khiak uh Mr Liankhanlal s/o H Lalsanglian Mualveng a om in January 8 2001 in sem panta hi. Amah Ebenezer Academy a Principal 12na ahi. Aman NEHU nuaiah B.A (Hons) azoh nungin Manipur University nuaiah M.A (Pol Sc) First Class in zou hi, tulel in staff 19 oma, student leng pung tou zel hi. Amah tungtawn a khantouhna leh masawna lam tampi a hong om ding i lamem a, i thumna ah leng phawk in kithuahpih chiat ni.

School Building Hong

EBC Songtal khua in school building behlapna dinga abawl uh zousiangta ua, February 2, 2001 niin Rev Kamkhanthang Dircetor of Institutions in hiai extension building honna leh Pathian kianga latna nei hi. Hiai building hon ahih toh kiton in sinlai naupangten luahpah ngal uhi. Tutel in hiai school ah semtu full time worker 4 om hi, amaute: Mr G Kamzamuan Headmaster, Mr Thangzaton, Mr chinkhanpau, Mr S Thangzam-te Asistant Teacher ngen ahi uh.

School a Semtute Dinmun

Tulel in EBC School 53 oma, semtu full time worker 97 pha hi. Lamka District sungah School a semtu13 leh school 8 oma, Singngat District ah semtu 41 leh School 20 oma, Thanlon District ah semtu 21 leh School 13 oma, Vangai District ah semtu 7 leh School 6 oma, Mizoram District ah semtu 6 leh School 6 om hi. Training lel 5 a om banah Utilized 4 om hi. Grant piak a etkol lel 8 om hi. Semtu kidaih zoulou ahihman in School neituten amau a ding private a na kizon in amaute toh pangkhawm a kienkol tou thei i hi.

SUUNNA



Upa Chin Gin (62)

Upa Chin-gin May 9, 1922 in Sinzawl khua ah piang hi. A neu a kipan a Pathian thu lunggulh mi ahia, Sinzawl khua ding a Khristian masa leh Saptuam phutkhe masate lak a makai muanhuai khat ahi. November 7, 1938 in Jesu Khrist Lal leh Hondampa dingin saang a, November 20, 1940 in Baptisma Pastor Goukholian khut a pan in tang hi. 1946 in tua a zi, Thuamniang toh khovel dan in ana kiteeng ua, hiai nung in leng saptuam makai in

ana pang gige lai hi. January 1, 1970 in sawm-a-khat ana pia a, February 13, 1972 in Saptuam Dan a kiteen thakna, Pastor Lamgin khut ah ana nei uhi. 1973 in ECC. Khawmpi lian 24 na, Sinzawl khua a om ah UPA ORDINATION Rev T Jamkhothang tungton in a tang hi. Saptuam kepna a ama hihtheihna tan a pangtou in, December 8, 1992, Convention Khawmpi 44 na ah Upa PAHTAKNA LAI ana sangta hi. Kum tamtak Toupa' Belamte a chin nungin, a nung a zuih Toupa'n a kiang ah kholtoldamta dingin, January 10, 2001 in ahinna hon laksakta hi. A luang Upate'n Biakinn a pawlut in, khelah leh itna tak toh vuiliam ahita hi.



Upa Neng Gin (60)

Upa Nenggin October 15, 1940 in Teikhang (Mizoram) khua ah piang hi. Aneu akipan a Khristian Innkuan a khanglian leh Biakna limsak mahmah mi ahi. Naupang heutu, KTP Committee member leh department tuam tuam te ah pan mun poimoh taktak ana len tou gige, mi muanhuai mahmah ahi. January 18, 1962 in Teikhang khua ah tua a zi, Nu, Vungching toh Saptuam Dansiangthou in ana kiteng uhi. (Huai hunlai in Salvation Army) ah ana om hi. 1966 kum in sawm-a-khat ana pia pan a, 1969 kum in Pastor Vungzachin khut apan in Baptisma ana tang hi. 1969 kum in Teikhang a kipan in Sinzawl ah ana peemlut ua, ahih theihna tan in Toupa Gam nasep nate ah ana pang tou gige hi. January 10, 1982 in, ECC. Kumsim khawmpilian 33na, Dorcas Hall a om ah, Upa Ordination Rev Liankhosiam khut ah ana tang ta hi. Upa Orden ahihnung, 1983 kum in a khelhnate kiphok thak in Jesu Khrist a Lal leh Hondampa ding a sanna nei in, kipak mahmah a, Toupa Belamte chinna ah ahitheih tan in pangtou gige a, a sih ni tanpha in Sinzawl EBC. Saptuam ah Vice Chairman in a pang hi. Kum 19 sung bang Toupa Belamte chinga, gin-omtak a aseppung in, Ana a sep Toupa'n A kianga khawl toltamta dingin

January 13, 2001 in alata hi. A luang Upate makaih in Biakinn a puaklut ahia, suunna hunte zat ahihnungin, akep a saptuam mipite'n it leh khelahtak in a luang Sinzawl hanmual ah kivui liamta hi.

- *T Paukhansiam*
Secy. Sinzawl EBC

Upa K.B. Rai (54)

Upa K.B Rai 1946 in piang a, Hindu sahkhuah a hong khangkhia ahi. Aman February 8 1987 in EBC Bethany ah Baptisma tang hi. EBC kumsim khawmpi 40na December 7 1988 in Rev (*Rtd*) T Jam Khothang khut tungtawn in Upa ordenna tang hi. Saptuam danin May 23 1990 in azi toh EBC Bethany ah kitenna nei uhi. 1993 kumin khosakna toh kisai in Manja ah hong pemlut hi. Manja Saptuamte toh kum 8 vel kithuah leh makaihna aneih sung in, mi damthei loutak himahleh lupna ngak zen ahihkei nakleh Biakna lam limsak mahmah mi ahi.

January 14th 2001 nitaklam dak 1:30 in leitung haksat nate thuk nawn lou dingin thupina mun Toupa kianga khawl tawl damta hi. Azi leh Tate pasal nih leh numei khat, leh saptuam pihten ngai mahmah kawmin kana khakhia uhi. Aluang Biakin sung a puaklut leh khakna neih ahih khit in hanmual ah vuiliam ahita. A inkuante leh Manja a Toupa saptuamte ading in hon thumsak chiat un.

Evan G Thangkhopau
Secretary Manja EBC



Kipahthu Genna leh Thumna Makai

March 2001

1. Ningani:

Tuni Khathak tan chidam tak a honpikai nawntu Pathian kiangah kipahthu genni. Tukha 7-11 sung Lamka Christopher Sun Crusade omding thumna in phawk ni.

2. Sintawpni:

Tuni apan 11 tan daih ding Shillong ah Rev S Nengzakhup Missionary chawmtu thak muhsuah ding ngimna in hun zang ding hi, thumna in phawk ni.

3. Kiginni:

EBC skula semtu khat Mr Nangsuanmung in February 12 niin thupina mun ah honna paisanta hi, a inkuante adingin khamuanna ngen in thumsak ni

4. Nipini:

Kumthak nung January kha sung in Toupa belampu 3 Upa Chingin Upa Nenggin Sinzawl tuak leh Upa K.B Rai Manja ten thupina ah hon kaisan uhi. A inkuante ading in khamuanna ngetsak ni.

5. Seppatni:

Lamka District sunga D Leikot kichi khawthak khat oma Mata

khua akipan gamla lou chik ahi, Biakin bawl kisan mahmah uhi thumsak zel ni.

6. Sepnawnni:

Zingchiang a kipanta ding Lamka ah nam tuamtuan kigawm khawm in Citywide Crusade om dinga Rev Dr Christopher Sun in thugen ding hi, lohching taka zat ahilhna dingin thum ni.

7. Nilaini:

Ebenezer Academy a Principal thak Mr Liankhanlal leh aseppihte banah school masawwna ding leh khantouh semna ding in thum ni.

8. Ningani: Convention Press Manager Upa N Thawnzagin leha seppihte banah Press puahphatna ding a tup leh ngim omte a tangtung na ding in thum ni.

9. Sintawpni:

Gujarat a zinling thuaka lungkham leh mangbang a omte thumsak ni. India miten Pathian hing a phawkna dingin leng thum ni.

10. Kiginni:

India phualpi a vaihawmtute, khawnbawl heutulianta ading in

Pathian deihdan theih theihna, vaihawm siamna ngen in thumsak ni.

11. Nipini:

Manipur State sung a vaihawmna lentute thumsak ni. Manipur a dan leh thupiak dinmun enkol tute ading in leng thumsak ni.

12. Seppatni:

Tuni apan 15 tan daih ding, Rev S Nengzakhup in Tuensang khua Nagaland ah mission puanzakna program Chang Baptist-te lakah nei ding hi, thumna in phawk ni.

13. Sepnawnni:

Thanlon a Convention English High School a Principal Mt T Nengdouthang leh a seppihte banah sinlai naupangte a ding in thumsak ni.

14. Nilaini:

EBC in khawvel pumpi a tangthupha puanzakna a lunglut a pan a lak laiin, tua lam subah thei dingin local spatuam mun khenkhat ah buaina leh thutuam latuam hongpiang nak sek ziakin, Toupa kiang ah thumna in phawk ni.

15. Ningani:

Bible Society of India-te nasepna leh ei toh i sepkhawmna a mohpuakna neite ading in thumsak ni. BSI ziakin kipahtu gen ni.

16. Sintawpni:

Bibles International a semtute leh

EBC toh i sepkhawmna a mohpawtute ading in thumsak ni. Bibles International ziakin kipahtu gen ni.

17. Kiginni:

Maharash state telin India gama state mun khen ah Khristiante douna uang nawn mahmah a setan theih tawp a pang ahita, eite leng Toupa a kisuhat in thakkheh chin thum ni.

18. Nipini:

Thanlon District sung a om Mualpheng khua luahnawn ahih toh kiton in Biakna kikhop leng pat hinawnta a, taksap tampi toh bulpan thak ahihman un thumsak zel ni.

19. Seppatni:

EBC School 53 omlel lakah tu dinmun in semtu 97 kia kinei zou lai a, khwatural chihte panlakna ziaka private a semtu ding alakte uh toh pangkhawm a kitem ahi. Amaute thumna in phawk zel ni.

20. Sepnawnni:

Jiribam Model High School a Principal Mr H Thanglianding leh a seppih dangte banah naupangte bang Khristian hilou leng tampi om ahi ua, thumsak ni.

21. Nilaini

India gam mun tuamtuum a sepaih pang a omte ading in kepbit a omna dingun, leh Pathian manggilh mai loua a omna munmun ua Pathian in a ompih na ding in thumsak ni.

22. Ningani:

Tuni apan ni 25 tan Mao ah North East India IEM Workers Retreat-cum-Missions Awareness program oma, Rev S Nengzakhup in makaih hi, thumna in phawk ni.

23. Sintawpni:

Tuni akipan ni 27 tan ding Nepal Mission Field Damak munah Tuailai Camp om dinga Rev S Langzakhm Director (Ms) in thugen ding hi. Thumna in phawk ni..

24. Kiginni:

India khawpi tuamtuam a laisin a omte kikhop khawmna Zomi Fellowship vaipawte leh akikhawm khawmte a dingin Pathian makaihna ngen in thumsak ni.

25. Nipini:

KNP Department in Zillai buthak atawite vualzawlina manphatak ahinna dingin thumni, hiai toh kisai in trainingna atamthei lam neih sawm ahi, thumna in phawk ni.

26. Seppatni:

Manipur Mission field a semtute tengteng a dingin ataksapna uh bangbang a Toupa huhna leh makaihna ngen in thumsak ni.

27. Sepnawnni:

Nepal Mission field a semtute, leh pawl dang akipana semtute a dingin thumsak ni. Nepal mite a dingin thum ni.

28. Nilaini:

Karbi Anglong a semtu i neihte banah Mission dang a kipana semtute leh a gam mite Karbi mite mahmah ading in thumsak ni.

29. Ningani:

Zingchianga kipan April ni 2tan daih ding Singngat District Tuailai Khawmpi 24na Singngat ah om ding hi. Lohching tak leh gahsuh taka zat ahinna dingin thumna in phawk ni

30. Sintawpni:

Saptuam sum kum (Financial year) beina toh kiton in Amah nna sepna dinga vualzawlina honpiak simseng louh sumlepai, chidamna leh hun hoihta ziakin kipah thu gen ni.

31. Kiginni:

Tuni Khabei tan hon pikai nawn ziakin Toupa kiangah kipah gen ni. Khawpi a EBC Saptuamte Delhi, Shillong, Aizawl, Shilchal, Dimapur, Kihoma, Itanagar a memberte ading in leh kemtute ading in thumsak ni.

**FAITH BAPTIST BIBLE COLLEGE
& SEMINARY**

Applications are invited from born-again Christian men and women who have the call of God for Christian service, for the following theological training:

COURSE	DURATION	QUALIFICATION
Diploma in Theology (Dip. Th)	2 Yes	SSLC Pass
Bachelor of Theology (B.Th)	4 Yes	SSLC Pass
Bachelor of Religious Education (B.R.E.)	4 Yes	SSLC Pass
Bachelor of Ministry (B.Min)	4 Yes	SSLC Pass
Master of Divinity (M.Div)	2 Yes	B.Th
	3 Yes	B.A.or equivalent
Master of Religious Education	2 Yes	B.R.E.
	3 Yes	B.A. or equivalent
Mater of Ministry (M.Min)	2 Yes	B.Th/B.R.E./B.Miss/ B.Min/B.A. or equivalent

New session will begin on July 1, for Bachelor level courses and June 1 for Master Level courses in 2001. Medium of instruction for all courses is English. Limited number of Scholarships are available for deserving candidates. The Present student body represent 21 language groups. The last date for submission of completed application form is may 31, 2001. Write to the following address for application form:

**Faith Baptist Bible College
P.O. Box - 2081
Cochin - 682 020, Kerela
Phone 0484 - 314834**

FOrM IV (See Rules 8)

Statement above ownership and other particulars of the Magazine
“Khristian Thukizakna”

1. Place of its Publication : Lamka, Manipur – 795 128
2. Periodicity of its Publication : Monthly
3. Printers name : Rev L Kham Kho Lun
Nationality : Indian
Address : Lamka, Manipur – 795 128
4. Publisher’s name : Rev L Kham Kho Lun
Nationality : Indian
Address : Lamka, Manipur – 795 128
5. Editor’s Name : Rev L Kham Kho Lun
Nationality : Indian
Address : Lamka, Manipur – 795 128
6. Name and Address of individuals who own the news paper and partner and shareholders holding more than one percent of the capital : The Evangelical Baptist Convention

I, Rev L Kham Kho Lun, hereby declare that the particulars given above are true to the best of my knowledge and belief.

**Date: Lamka
February 20th 2001**

**Sd/-
Rev L Kham Kho Lun
Signature of Publisher**

NAUPANG TOHLET

Sinsaktu Naran

- Ø Committee na muna thupukna kilawm taktak bawl natan adeih khop, aban a sepuina lam awlmoh nawn lou hi.
- Ø A mohpuakna hoih tak leh kizen taka ahihtheih nakleh sep dingte zouta bangin kingai alungkim hi.
- Ø Class hoih taka la khina asepu khit chiang in lungkim takin Pathian a phat hi.
- Ø A mohpuak nate kizen taka asepu zoh theihna ding in Khasiangthou panpihna ngen a, asepu zoh chiangin amahle fel kisa hi.
- Ø Naupangte laka a sinsak ding zahzah class sung ah zou vek thei hi, khawlak ah etton tak hin khua a nei kei.
- Ø Vaihawmtute sangin lemgel asiam zaw a, apil zaw a, huaiziakin phun phun louh vual ahi kei.

Sinsaktu Hoih

- Ø Committee na muna thupukna hoih taktakte sepuah dan ding sepuah dan ding awlmoh pen in a nei hi.
- Ø Class hoih tak leh kizen taka alak khit chiangin leng, a gah muh ding azong laia, agah amuh chiangin a lungkim pan hi.
- Ø A nasepu a kipan gah muh ding a om chiang in Pathian a phat a lungkim theita hi.
- Ø A nasepu ten gah manpha leh thupi a suah theihna dingin Khasiangthou panpihna a ngen sek hi. A lohchin chiang in Pathian thupi sapen hi.
- Ø Class sung khawlak leh mun tengah naupangte a dia etton tak hinkhua anei a, a hinkhua in a sinsak tam zaw hi.
- Ø Vaihawmtute hawm bangbang aom dinga mansa in aom ziakin, phunna ding amu ngei kei.

- Child Worker



EBC Biakim Bungpilon

To :

If undelivered, please return to : ?

**The Editor
Christian Thukizakna
P O Box - 6, Dorcas Hall
New Lamka - 795 128
Manipur, INDIA**